

22.september

Uunga siunnersuut: Tikeraat ornittagaannik takornariatitsivinnillu pilersitsisarneq ingerlatsinerlu pillugit Inatsisartut inatsisaat nr. xx, xx. xxx 2016-imeersoq.

(Inuussutissarsiornermut, Suliffeqarnermut Niuernermut Nunanullu Allanut Naalakkersuisoq)

Siumumiit pingaartipparput arlariinnik aningaasarsiornikkut toqqammaveqarluni ingerlatsinissaq anguniartuarneqassasoq, aatsaat taamaaliornikkut inuussutissarsiutit pilersaarutaasumiit allaanerusumik atugaqarfiussappata nunarput nukittunerusumik ingerlaqqissinnaassammat.

Inuussutissarsiutit nukittuut pilersinneqassappata aqqutit atorneqanngitsut ilaanni atuatalanneqartartussaapput, taamaaliornikkulli arlaatigut pilersaarutaasumiit ajornerusumik angusaqartoqarsinnaasassaaq soorluttaaq annertoqataanik iluatsikkaangata iluatsilluarsinnaasassallutik.

Siunnersuutikkut anguniarneqarpoq nunatsinni takornariaqarneq aningaasarsiornikkut nappataasut ilagilissagaat, taamatullu iluanaarutaasut sammivinnut amerlanerusunut siaruarterneqartarnissaat siunertaasoq. Suliffissanik sumiiffinni najukkami amerlanerusunik pilersitsiviussasut takorlooruminarpoq, tamannalu inuiaqatigiit Siumullu siunertaanut naapertuulluurtuummat ilassilluarlugu oqaatigissavarput.

Takornariat nunatsinnukartarput inooriaatsitsinnik pinngortitamillu immikkuullarittumik takusaqarnissartik misigisaqarnissartillu siunertaralugu.

Tikeraat ornittagaannik pilersitsiniarnerup siunertaraa takornariat amerlanerusut nunatsinnut tikittaleriartortillugit tikeraat ornittagaat kajungersaatitut pilersitsiviusunngortinnissaat. Siunertat ilagaat sumiiffinni assigiinngissutsit atorluarlugit nunatta pissarititaanik nerisassanik ussiisinaanissaq aammalu kusanartuliat assigiinngitsut sumiiffimmi ataatsimi tuniniaasinnaanissaq, taamaasilluni tamanik atorluanerusinnaanissaq anguniarneqarluni.

Siumumiit qularinngilarput pilersitsiniarnerup piffissaq siumut sivilunerusoq isigalugu nunarput iluaquserluassagaa.

Maluginiagassaavoq suliniutit arlariit imminnut atassuserlugit, pilersaarutaasut malillugit Naalakkersuinikkut saqqummiunneqarmata, tamanna nukittoqutaasussaavoq killormulli arlaat iluatsinngitsuussappat aamma tamanut sunniuteqarsinnaalluni, taamaattumik pingaaruteqarpoq pilersaarutaasut arlaat iluatsissanngippata sunik sunniuteqarsinnaanera siumoortumik eqqumaffigisassat pillugit pilersaaruteqarnissaq; Naalakkersuisunut tamanna kaammattuutigissavarput eqqumaffigeq-qullugu.

Suliniutit nunani allani misilittakkat iluatsiffiusut qiviallattaallugit nunatsinnittaaq ingerlanneqarniarmata tamassuma soqutiginaatigissavaa immikkut nunatsinnut kulturitsinnullu tulluusakkamik ingerlatsisoqarnissaa, nunarpummi apeqquserneqarsinnaanngitsumik nunani allaniit allaanerusunik neqerooruteqarsinnaasoq qularutissaangimmat.

Pilersaarut malillugu pisortat piginnittuullutillu ingerlatsisuussapput, tamannali kingusinnerusukkut Namminersortut peqatigalugit isumaqatigiissuteqarnikkut ingerlatsisoqarsinnaanissamut mattussi-nngitsaq takuneqarsinnaavoq.

Pilersaarutaasut angisuunik takorluuineramik nassataqarput tamassumalu aningaasarsiornikkut akilersinnaasumik erngertumik ingerlatsiviulersinnaanissaat killilersorpaat, taamaattumik suliniutaasussat annikinnerusut aningaasarsiornikkullu ingerlaannaq akilersinnaalersussat pillugit pingaaruteqarpoq nunaqavissut peqataatillugit ingerlanneqarnissaat.

Aalajangiiffissatut siunnersuut ilalerlugu Inuussutissarsiornermut Ataatsimiititaliamut ingerlatineqassasoq inassutigaarput.

Suka K.Frederiksen

Siumut